



Cultivar il sescagnar e far pasch

Discuors cun duas dallas organisaturas digl «Ilanzer Sommer 2021»

AUGUSTIN BEELI/FMR

■ **Dils 8 tochen ils 14 d'uoost 2021 ei a Glion per l'emprema gada in grond simposi naziunal. L'occurranza ella Casa Sentupada dalla claustra organischa l'uniun «Forum für Friedenskultur». Janice Camenisch da Schluein s'engascha en in pensum parzial sco menadra dil project. Ensemen cul meingestiuun Adi Blum e la pacifista Lea Suter fuorma ella il comite d'organisasiun.** Il Forum per la pasch s'engascha per ina Svizra che viva activamein ina cultura da pasch, e quella duei includer tuttas generaziuns e gruppas da nosa societad. La «Stad da Glion 2021» ei l'occurranza inziala dil Forum e duei daventar ina instituziun. Agl «Ilanzer Sommer» lavura glied ch'ei s'annunziada treis gis en gruppas e luvratoris tier las tematicas «vischnauncas», «scolas» e «medias». La damonda ei co ins promovva ni savess promover en quellas spartas la pasch. In program multifar el Cinema Sil Plaz ed el Museum Regional Surselva accumpogna quell'jamna culla tematica centrala.

L'jamna digl «Ilanzer Sommer» vegn aviarta gliendisgis, ils 8 d'uoost 2021 el foyer dall'aula dalla claustra dallas soras dominicanas. Lezzas sezzas ein buca involvadas ell'organisasiun. L'avertura moderescha il menader dil Forum per cultura da pasch, *Adi Blum*. Ensemen cun *Janice Camenisch* da Schluein, sco era la pacifista *Lea Suter* (mira intervesta e box), fuorma el il comite d'organisasiun. Per la «Stad da Glion 2021» beneventa il Forum personalitads dalla politica, economia e cultura dalla regiun e d'ordeifer.

FMR: Janice Camenisch, ei tut semtgau per quell'occurranza gronda a Glion?

Gie, dapi l'jamna vargada havein tut ensemen. Il program, las personas, las occurrenzas ed ils termins ein fixai definitivamein e nus havein aviert il portal per las annunziass.

Il program dils 8 tochen ils 14 d'uoost 2021 ei pulpius. Tgei ei el center?

Igl ei surveseivel e cunzun interessant, gliez sai jeu empermetter. Ella pagina d'internet havein nus sespruau da strutturar bein tut. «Ilanzer Sommer» se cumpona da duas parts, inagada in program cultural e lu in Forum per cultura da pasch ella Casa Sentupada dalla claustra. Nus vulein porscher ad indigens e hosps occurrenzas interessantas.

Explicitamein sedrizein nus buca mo a hosps d'ordeifer, mobein era alla populaziun indigena.

Tgei plai specialmein a Vos dil program?

Jeu vi mo menziunar l'avertura festiva, la dumengia ils 8 d'uoost cun tuts involvai. Nus astgein beneventar gl'antierur diplomat e president dil Comitè internaziunal dalla Crusch cotschna, *Jakob Kellenberger*. El vegn a far in referat introductiv. Lu suonda il concert «La Nova» da *Corin Curschellas*. Jeu selegrel era sil program el Cinema Sil Plaz. Leu dat ei l'entira jamna ina retscha da films ch'ei fetg unics cun pusseivladads da discutir. Era reschissurs ein presents. Lu ei il Museum Regional Surselva invol-

vau. Leu dat ei tschun seras cun ponderaziuns nua che personalitads da politica, cultura ed economia s'expriman e discuteschan tier tematicas heichias.

Conta glied spitgeis agl «Ilanzer Sommer», ni conta glied astga separticipar?

Pil program dil kino ei il Cinema Sil Plaz responsabels. Leu han 40 personas plaz mintga sera, semplamein tenor la situaziun da Covid-19 che vala gl'uoost. Per il forum havein nus risguardau quellas normas e limitau il diember da participants. Tgi che vul separticipar al Forum, sto s'annunziar. En special vi jeu render attent al program «tracks» che sedrezza specialmein a vischnauncas, scolas e medias, sco era ils ateliers cun impuls tematics per tuts ch'ei interessai. Il Forum sedrezza a tuts, indigens e hosps.

Lea Suter, Vos essas enconuschenta en Svizra cun Vies blog per la pasch. Ussa s'engascheis Vos sco presidenta dil nieufundau Forum per cultura da pasch cun sedia a Glion. Haveis Vos ina relaziun cun Glion etni la Surselva?

Tochen il november digl onn vargau havevel jeu negina relaziun directa cun Glion ed enconuschevel era buca la claustra dallas soras dominicanas. Il spital regiunal havevel jeu en fetg buna memoria pervia d'in accident da skis en mia giuventetgna. A Glion han ins salvau lezza gada a mi ina comba.

Aschia sundel jeu stada surstada posi-



Lea Suter (sen.) e Janice Camenisch organischan l'jamna tematica «llanzer Sommer 2021» dalla pasch.

FOTO AUGUSTIN BEELI

tivamein cu jeu hai retschert ina damonda sch'jeu vegli surpender il presidi d'ina uniun nova Forum per la cultura da pasch. Miez november havein nus fundau quel e dapi lu emprendel jeu d'enconuscher Glion, la regiun e sia populaziun.

La «pasch» vegn ad esser el center a Glion. Nus astgein viver en ina tiara e regiun pascheivla.

Daco drova ei in tal «Forum» per promover la pasch?

Pasch ei buca mo in plaid vit ed ina floscla mobein includa tuttas spartas dalla veta. Quei sa esser la pasch en scola, e co ins va entuorn leu cun conflicts. Dall'otra vart sa ei dar malapasch en ina vischnaunca. Lu eis ei da sedumandar co ins duei ir entuorn cun conflicts sociopolitics. Era en numerusas autras spartas, brats d'opiniun e contacts dalla veta publica ed el mintgadi ston ins adina puspei encurir la pasch.

Essas Vus digl avis che nus tgrien en Svizra memia pauc ina cultura da pasch?

Quei ch'jeu constateschel ei ch'ei dat en Svizra in post cumpetent per dumignar conflicts. Quel drovan las autoritads denton per la politica digl exteriur da nossa tiara. Nus Svizzers mein en autras tiaras e purschein nos survetschs ad autras tiaras sco mediatur en cass da conflicts. Ell'atgna tiara perencunter vegn purschiu memia pauc en caussa dil sli-giar conflicts. Gest cheu schai il grond potenzial co nus savessen tgriar ina convivenza pascheivla.

La Svizra, ina tiara multiculturala, vala sco exempel dalla convivenza pascheivla. Cultura da dispetta drova ei denton en quei construct, ni buc?

Gie, exnum. La cultura da pasch includa en scadin cass era la cultura da se-

scagnar. Ei duvras dil reminent dapli plascher per dispettas e dameins tema da conflicts. Savens untgin nus dispettas ni conflicts, perquei che nus vesein quei sco enzatgei negativ. Dispettas san destruir relaziuns e far fetg mal. Tgei che nies Forum per la pasch vul derasar ei la savida per metodas che gidan nus d'ir entuorn da maniera constructiva cun conflicts. Quei duessen nus la fin finala apprezzar sco in potenzial.

Violenza ed uiara ei il scalem pli ault dil conflict. Aschi lunsch duess ei mai vegnir en ina cultura da far pasch e da sescagnar?

Dalla cultura da pasch duessen nus propi trer conclusiuns che gidan nus da sli-giar conflicts – e buca da dar fiug a quels. Diversas fuormas da violenza derivan da sescagnems. Quei sa esser violenza el pign e privat, tochen tiel grond ed internaziunal. Cultivar ina cultura da pasch sa evitar violenza psichica e fi-



sica tochen sil plaun internaziunal.

Quei tuna interessant. Janice Camenisch, en quei senn savess il Forum naziunal per la pasch esser in «WEF», sco il forum a Tavau. Leu ei l'economia el center, a Glion la cultura da pasch?

Na, sin quei nivo mein nus buc. Il WEF han ins fundau sco occurrenza internaziunala. La «Stad da Glion» duei s'occupar culla cultura da pasch dils singuls carstgauns e promover la convivenza. Igl ei in'jamna per tuts, per la populaziun e buca per in cerchel serrau da carstgauns elitars.

Sin tgei persunalitads selegreis Vos specialmein agl «Ilanzzer Sommer 2021»

Silla sentupada cul sociolog american *John-Paul Läderach*. El ei ina figura centrala e renconuschida internaziunalmein el sectur dalla promoziun dalla pasch, el vala sco pionier dalla transformaziun da conflicts. Läderach ha elaborau ed accumpignau process da mediaziun en pli che 25 tiaras.

E Vos, Lea Suter?

Jeu selegrel silla dinamica entira da quella «Stad da Glion 2021». Lu naturalmein sil program variont cun ina massa sentupadas. La part culturala e las seras da ponderaziun el Museum regiunal vegnan ad esser inspirativas. La mischeida d'in punct da partenza cumplexiv per tgirar ina cultura da pasch duei gidar a scadina e scadin.

Dapli informaziuns ed il program mira www.ilanzersommer.ch

ilanzersommer.ch

Il Forum per la pasch sefatschenta culla damonda tgei che cultura da pasch savess esser. Lea Suter, ina dalla pli enconuschentas pacifistas dalla Svizra, presidescha quell'uniun fundada il november 2020. La dunna da 37 onns ei naschida e carschida si ell'Argovia e habitescha oz a Thun. En ses blogs virtuals rapporta ella da proceduras da pasch egl Irak, Libanon, Mali, Cosovo, l'Ucraina, Ruanda ed autras tiaras. Ella senumna senza sco reporterera dalla pasch, il cuntrari da «reportera d'uiara».